

奉天通志

十函之六

奉天通志卷一百四十九

教育志

禮曰建國君民教學爲先邳治之道此爲要矣遼東古屬青冀二州之域秦漢雖曾設郡統治而庠序之教未遑及也漢末管寧王烈避難來居講詩書陳俎豆飾威儀明禮讓教化所及止於鄉邑榛狉之風未盡變也晉時慕容廆都棘城曾興學而以平原劉瓚爲東庠祭酒隋唐武功遠及遼海戎馬之外未暇興學契丹立國武功頗盛惟載籍闕略養士之典未詳旁稽他書教育之制亦可略見一斑金源崛起自創女真文字用以教化迨章宗大定十九年始議興學遂計州府戶口增養士之數學制漸立規模矣元代繼起諸路立學文廟舊址至今猶可考稽朱明混一之後於遼東

設都指揮使司統轄諸衛整治武備兼修文教於是儒學書院遍於各衛育材課士得人稱最盛焉有清定鼎燕京以盛京爲陪都重熙累洽文化誕敷所有社學義學書院規制尤爲擴充光緒末葉罷科舉設學堂明定教育宗旨學制因而一變惟值庚子變後民生凋敝財力竭蹶擘畫經營創始匪易又遭甲辰日俄戰後教育重受摧殘至光緒三十年後激勵振奮不數年間學校次第成立以視內地各省未遑多讓近頃則教育宗旨屢經更定全省學校日益普及而教育精神則以智育體育德育爲指歸並側重實業普通中學之外於農工商各專門教育尤加提倡人材蔚起發達正未有量也爰稽舊志起於遼金迄於近世分代紀述庶數百年間奉省教育之變遷興革可以窺其概略矣述教育志凡得五

卷

教育一 遼金元明

往古遼東諸族之文化

滿洲源流考肅慎之世彷彿結繩夫餘禮教漸興會同俎豆之儀同於三代百濟新羅文采蔚焉與隋唐使命往來兼擅詞章之美洎渤海興而文物聲明臻於至盛經契丹兵燹名教大族轉徙他州而淳樸之風遂鍾於完顏部人無外慕道不拾遺依然肅慎之舊矣至字書則百濟新羅渤海沿用漢字金初尙用契丹字至金太祖始製女真字頒行天下熙宗又製女真小字用以譯經史試科舉至蒙古字行而女真字遂中輟明祕閣書目尙載有女真字母一書今已失傳趙岫石墨鐫華所錄其石刻雖在陝西第果否

當時所刻或後人依仿摹勒皆未可定清太祖創製滿洲書精詳簡括雖言語與舊俗不殊而文字實不相沿也

遼之文教及學制

文教 後唐天成三年王晏球等獲契丹絹書二封來進明宗命宣示羣臣莫有識其文字者契丹本無文記惟刻木爲信漢人陷蕃者以隸書之半就加增減撰爲胡文同光之後稍稍有之

五代史會

要

遼起松漠太祖以兵經略方內禮文之事固所未遑及太宗入汴取晉圖書禮器而北然後制度漸以修舉至景盛間則科目聿興士有由下僚擢升侍從駸駸崇儒之美但其風氣剛勁三面鄰敵

歲時以蒐獮爲務而典章文物視古猶闕

遼史文
學傳

按遼起邊塞樸鄙無文及太宗得石晉之燕雲十六州始與中國文化相接觸至聖宗與宋盟好使命交通由是中原文學之士仕於其朝者日衆因而捨棄舊俗習尚儒學學校科目之制乃漸以興起矣

學制 聖宗開泰元年十二月歸州言其居民本新羅所遷未習文學請設學以教許之

續文獻通考

按遼歸州屬東京道治歸勝金廢今奉天蓋平縣西南九十里有歸州

道宗清寧元年十二月詔設學養士頒五經傳疏置博士助教各

一員

同上

遼制五京設太學外諸道州縣皆設學

遼史

按遼史地理志東京遼陽府卽今遼陽地方所屬州縣旣皆設學當時教育之盛可以想見特遼史闕略制度未詳爲足憾耳又據遼史百官志府州縣學皆有博士助教是官師之制又見一斑矣

附錄

王圻續通考遼太祖時置上京國子監祭酒司業監丞主簿時南京立太學聖宗統和九年八月以南京太學生員寢廣特賜水磴莊一區道宗清寧五年詔設學養士頒五經及傳疏置博士助教各一員六年六月中京置國子監

宣府鎮志契丹初興惟尙武藝燕趙間學校俱仍唐舊間羅兵燹十存二三取用文士多由是奮興宗重熙五年始御元和殿

以日射三十六熊賦幸燕詩試進士於廷著爲令式至道宗乃詔設學養士於是有西京學有奉聖歸化雲德宏蔚媯儒等州學各建孔子廟頒賜五京諸家傳疏令博士助教教之屬縣附

焉

屬諸州遼史拾遺曰此但據西京諸言之五京諸州俱有學

契丹國志太祖龍興朔漠之區倥偬干戈未有科目數世後承平日久始有開闢限以三歲有鄉府省三試之設鄉中曰鄉薦府中曰府解省中曰及第有秀才未願起者州縣必根刷遣之程文分兩科曰詩賦曰經義魁各分焉三歲一試進士

金之文教及學制

文教 金完顏希尹本名古紳太祖命撰本國字備制度希尹乃依仿漢人楷字因契丹字制度合本國語製女眞字天輔三年八

月書成太祖大悅命頒行之其後熙宗亦製女真字與希尹所製字俱行用希尹所撰謂之女真大字熙宗所撰謂之小字

金史

世宗二十三年八月以女真字孝經千部分賜護衛親軍九月譯經所進所譯易書論語孟子老子揚子文中子及新唐書上謂宰臣曰朕所以令譯五經者正欲女真人知仁義道德所在耳令頒行之二十八年四月命建女真大學

同上

大定十一年勅設女真進士科初但試策後增試論用女真文字以爲程文就其所長以收其用又行國字使通習而不廢

金史
選舉

策論進士女真人之科也始大定四年世宗命頒行女真大小字所譯經書每穆昆選二人習之尋欲興女真字學校明安穆昆內多擇良家子爲諸生諸路至三千人九年選異等者得百人薦於

師廩給之命教以古書作詩策後復試得圖克坦鑑以下三十餘人十一年始議行策選之制至十三年始定每場策一道以五百字以上咸免鄉試府試止赴會試御試且設京師女真國子學諸路設女真府學擬以新進士充教授以教士民子弟之願學者上同凡府試策論進士明昌元年添北京西京益都爲七處凡咸平隆州博索東京蓋州懿州者則赴咸平府試上同

凡詞賦經義進士及律科經童府試之處明昌初增遼陽平陽益都爲九處上京東京咸平府等路則試於遼陽府上同

學制 據金史選舉志世宗大定四年立諸路女直學以女直大小字譯尙書頒行之擇明安穆昆內良家子弟爲諸生諸路至三千人九年取其尤俊秀者百人至京師以編修官溫特赫吉達教

之十三年諸路始設女直府學以新進士充教授以教士民子弟之願學者凡取府學生之制每穆昆取二人若宗室每二十戶內無願學者則取有物力家子弟年十三以上二十以下者充凡會課三日作策論一道季月私試大定二十九年上封事者乞興學校下尙書省集百官議戶部尙書鄧儼等謂唐太宗養士至八千人亡宋兩學五千人今策論詞賦經義三科取士而太學所養止百六十人外京府或止十人天下僅及千人今若每州設學專除教授月加考試每舉所取數多者賞其學官月試定爲三等籍之一歲中頻在上等者優復之不率教行惡者黜之庶幾得入之道也帝從其議遂計州府戶口增養士之數於大定舊制京府十七處千人之外置節鎮防禦刺史州學六十處增養千人各設教授

一員選五舉終場或進士年五十以上者爲之府學二十有四學生九百五人又府州學二十二屬東京咸平各路者計

遼陽三十人教授一員

咸平二十人教授一員

廣寧二十人教授一員

博索府學教授一員

蓋州府學教授一員

興中府學二十人教授一員

金史百官志諸府教授一員諸節鎮州教授一員諸防禦州教

授一員

至於課士之法及學校規程據金史選舉志大定十六年定經學

課士之制凡經易則用王弼韓康伯註書用孔安國註詩用毛萇
傳鄭玄箋春秋左氏傳用杜預註禮記用孔穎達疏周禮用鄭玄
註賈公彥疏論語用何晏集註邢昺疏孟子用趙岐註孫奭疏孝
經用唐玄宗註史記用裴駙註前漢書用顏師古註後漢書用李
賢註三國志用裴松之註及唐太宗晉書沈約宋書蕭子顯齊書
姚思廉梁書陳書魏收後魏書李百藥北齊書令狐德棻周書魏
徵隋書新舊唐書新舊五代史老子用唐玄宗註疏荀子用楊倞
註揚子用李軌宋咸柳宗元吳祕註皆自國子監印之授諸學校
凡學生會課三日作策論一道又三日作賦及詩各一篇三月一
私試以季月初先試賦間一日試策論中選者以上五名申部遇
旬休節辰皆有假病則給假省親遠行則給程犯學規者罰不率

教者黜遭喪百日後求入學者不得與釋奠禮

其養士之法據續文獻通考自章宗泰和元年九月定贍學養士法生員給民佃官田人六十畝歲支粟三十石

元之興學及學校

據元史選舉志太宗始定中原卽議建學設科取士又世祖本紀中統二年九月翰林院學士承旨王鶚請於各路選委博學老儒一人提舉本路學校特詔立諸路提舉學校官以王萬慶敬鉉等三十人充之凡諸生進修者嚴加訓誨務使成材以備選用又選舉志至元六年秋七月置諸路蒙古字學十二月中書省定學制頒行之命諸路府官子弟入學上路二人下路二人府一人州一人餘民間子弟上路三十人下路二十五人願充生徒者與免一

身雜役以譯寫通鑑節要頒行各路以肄習之又世祖本紀七年夏四月壬午設諸路蒙古字學教授又續文獻通考大德四年添設學正一員上至國學下至州縣學生員高等者從翰林院考試凡學官譯史取以充焉五年十月又定生員散府二十人上中州十五人下州十人又仁宗本紀二年春正月己未置遼陽行省儒學提舉司

元史世祖本紀大司農司所上諸路學校之數至元二十三年二萬一百六十六所二十五年二萬四千四百餘所二十八年二萬一千三百餘所

元史選舉志凡師儒之命於朝廷者曰教授路府上中州置之命於禮部及行省與宣慰司者曰學正山長學錄教諭路州縣及書

院置之路設教授學正學錄各一員散府上中州設教授一員下州設學正一員縣設教諭一員書院設山長一員又續文獻通考凡路州府書院設直學以掌錢穀從郡守及憲府官試補考滿升學錄教諭錄諭升正長正長升教授凡正長錄諭教授或由集賢院及臺憲等官舉充之教授之上各省設正副提舉各一員提舉學校之事其後直學考滿爲州吏例以下第舉人充正長備榜舉人充錄諭有薦舉者亦參用之自京學州縣學以及書院凡生徒之肄業於是者守令舉薦之臺憲考覈之或用爲教官或爲吏屬往往人材輩出焉

按據元史本紀及選舉志所載元於各路府州縣皆設學校數至二萬四千四百餘所之多中書省又定學制頒行是當時教

育制度必極詳備第學校地址史無明文僅仁宗本紀載有遼陽行省儒學提舉司之設耳今據遼東志建置志所載則遼東元代儒學遺址猶有可考者分列於後

遼陽都司學注云元儒學舊基在都司後

廣寧衛學注云金遼以前莫考元置廣寧府路儒學舊址在廣寧右衛西北元季燬於兵

義州衛學注云先代無考大德間有加封先師碑

三萬衛學注云元有文廟舊址在今三萬衛北街有大德加封碑記

廣寧中左屯衛學注云前代無考成化間於城隍祠得元加封先師碑故知爲文廟舊址